

Wenn du nun die eine gegene Dörffer / wie gemeldet / auff vorigen
zweyen Ständen A vnd Q. observirt hast / vnd woltest eine andere gegene
Dörffer zu observiren fürnehmen / so soltu das Instrument im Punct Q.
stehen lassen / wie es zuvor gerichtet ist / vnd vom Q. an ein Ort gehen / da du
noch ein andere Gegene Dörffer sehen könnest / dahin laß dir ein ander Zei-
chen stecken / mit R. verzeichnet / vnd observire von Q. auff dis Zeichen R.
vnd habe acht / was dir die Regel für ein Grad durchschneidet / vnd in welcher
Quart das geschieht / daß schreibe fleißig auff / vnd miß dann die Weite zwi-
schen Q. vnd R. vnd schreibe die auch auff / nach diesem stecke den Pfal des
Astrolabij in dem neuen gemachten Stand R. vnd rücke die Regel wieder
auff den Gegenrad / den dir die Regel hat angezeigt / wie du von Q. auff R.
geobservirt hast / alsdenn stehet das Instrument recht / daß befestige mit den
Schrauben / daß es nicht verrücke / vnd observire wieder wie vor / vber die
Dörffer weg / auff eine Höhe / dahin du solt noch ein Zeichen stecken lassen /
da du den andern Stand / wie zum ersten mit A. vnd Q. geschehen / ha-
ben könnest / vnd procedire dann / wie du zuvor gelehret bist / bis daß du alle
die Dörffer der Graffschafft observirt hast / nach diesem soltu auch die
Gränze derselben Graffschafft messen / gleich wie zuvor in dem vierzehenden
Capittel der Schanzen gelehret worden / vnd procedire so lange / bis du
gar herum kumpst / imgleichen handle auch mit denen darin gelegenen
Hölsungen / allein / daß du allewegen von einem gewissen Orte nach dem
Instrument an die Gränze oder Hölsunge eine gewisse Lini / wie von Q. auff
R. geschehen / nimmest vnd messest / wie dich dein Verstand selber wol lehren
wird / vnd davon weiter viel Wort zu machen / nicht nötig ist / allein wil ich
dich noch lehren / wie du das solt in Grund legen / vnd auff Papier bringen /
wie folget :

Wiltu nun diese Dörffer aus dem Register auff das Papier bringen /
daß sie dieser vorhergehenden Figur ehnlich werden / so nimb einen halben
Bogen Papier / nach deme du das Werck groß oder klein auffbringen wilt /
vnd theile unten darauff einen verjüngten Maßstab / ungefehr in ein tausend
gleiche Theile / gleich wie du in negst vorhergehender Figur zu ersehen hast /
vnd hefte es mit Wachs auff ein reines Bret / oder auff den Tisch / vnd
reiß zu erst eine blinde Lini mitten wurch vber das Papier / vnd mache
forne zur Linken Hand auff der Lini ein Centrum A. bedeut den ersten
Stand / vnd nimb denn dein Instrument Directorium genant / vnd lege
es auff das Papier / also / daß des Circels Centrum auff den gemachten